

Հ Ա Ռ Պ Վ Ա Մ Ն Ե Ր

ՀԱՅՐԵՆԻ ԱՐԵՎԵԼԱԳԻՏՈՒԹՅԱՆ ԶԱՐԳԱՅՄԱՆ ՊԱՏՄՈՒԹՅՈՒՆՆԵՐ

Հ. Գ. ԻՆՃԻԿՅԱՆ

Այս տարի նշվում է Ռուսաստանում արևելագիտական հիմնարկների ստեղծման 150-ամյակը: Արևելագիտությունը «Արևելքի» ուսումնասիրությունը, իհարկե, շատ ավելի հին է, որովհետև Արևելքի երկրները եղել են մարդկային մշակույթի ամենահին օջախները, և առաջին գիրն ու գրականությունը պատկանում է նրանց: Այդ առումով էլ մեր երկրում արևելագիտությունն ունի դարերի պատմություն: Տվյալ դեպքում, ի նկատի է առնվում Պետերբուրգում «Ասիական թանգարան»-ի կազմակերպումը 1818 թ. նոյեմբերի 11-ին: Սկզբնական շրջանում այն եղել է իրասպես թանգարան՝ լուսավորչական որոշակի թեքումով: Սակայն իր ավելի քան հարյուր տարվա գոյության ընթացքում նրա տպագիր ու ձեռագիր ֆոնդերը աճեցին և կազմեցին 250 հազար միավորից ավելի և ստացան համաշխարհային ճանաչում՝ որպես արևելագիտական կարևորագույն կենտրոնի: Զարգացման նման ընթացքի վրա խոշոր ազդեցություն ունեցավ նրա ղեկավարների ընտրությունը, որոնց անունները մտել են համաշխարհային գիտության ոսկյա ֆոնդը: Թանգարանի հիմնադիր և ղեկավար Խ. Ֆրենի կողքին պետք է հիշել Մ. Ի. Բրոսսեի, Բ. Ա. Դորնի, Վ. Դ. Ռոզենի, Վ. Վ. Ռադլովի, Պ. Ս. Սավելևի, Վ. Գ. Տիգենհաուզենի անունները: Հետհոկտեմբերյան շրջանում, մինչև նրա վերակառուցման միջոցով արևելագիտության ինստիտուտի ստեղծումը (1930 թ.), թանգարանի բախտը կապված է եղել ակադեմիկոսներ Ա. Ֆ. Օլդենբուրգի, Վ. Վ. Բարտոլդի, Ի. Յու. Կրաչկովսկու, Ֆ. Ի. Ուսպենսկու, Բ. Յա. Վլադիմիրցևի, Հ. Ա. Օրբելու հետ: Ասիական թանգարանը երկրի միակ արևելագիտական հիմնարկը չի եղել: Այդ գիտությունը զարգացել է լազարյան ճեմարանում և ուսումնական այլ հիմնարկներում: Նրա սկզբնական քայլերը կապված են արևելյան լեզուների ուսումնասիրության հետ: Սակայն ներկայումս աբելագիտությունը դիտվում է որպես գիտությունների մի ամբողջություն, որի ուսումնասիրության առարկա են Արևելքի ժողովուրդների պատմությունը, տնտեսությունը, լեզուները, գրականությունը, արվեստը, նյութական և հոգևոր մշակույթի հուշարձանները:

Աբելի հասկացությունը աշխարհագրական և պատմական իմաստով ենթարկվել է բազմաթիվ փոփոխությունների: Այն դեռևս հին եգիպտացիները և հրեաները օգտագործում էին, նկատի ունենալով իրենց արևելյան հարևաններին: Հույներն այդ հասկացության տակ ըմբռնում էին հելլենական աշխարհից արևելք ընկած բոլոր երկրները, մասնավորապես Պարսկաստանը: Հռոմեացիներն այն ավելի ընդարձակեցին, ընդգրկելով Իտալիայից արևելք եղած բոլոր երկրները, նաև Բյուզանդական կայսրությունը, երբ վերջինս IV դարի

ավարտին անջատվեց Հոռմից: Միջին դարերում եվրոպական ժողովուրդների համար արևելյան երկրներ էին համարվում Ասիայի, Հյուսիսային Աֆրիկայի և թուրքական տիրապետության տակ գտնվող Բալկանների սլավոնական երկրները: Քիչ ավելի ուշ, աշխարհագրական հասկացությունները ճշտվեցին և գործածության մեջ մտան Մերձավոր, Միջին ու Հեռավոր արևելք տերմինները:

Ինչպես իրավացի կերպով նշում է ակադեմիկոս Ն. Կոնրադը, անհրաժեշտ է պատմության օրինաչափությունները ուսումնասիրելիս ելնել «ամբողջ մաքրկույթյան պատմությունից և ոչ թե առանձին երկրների կամ ժողովուրդների: Այնպիսի հասկացություններ, ինչպես՝ «Եվրոպա», «Ասիա», «Աֆրիկա» և այլն, աշխարհագրական, և ոչ պատմական հասկացություններ են: Լավագույն դեպքում նրանք վերաբերում են պատմական աշխարհագրությանը: Հիմնավորված չեն նաև այնպիսի հասկացություններ, ինչպես «Արևելք» և «Արևմուտք»: Լավագույն դեպքում նրանք ցույց են տալիս առանձին ժողովուրդների խմբեր, որոնք, սակայն, ունեն փոփոխվող բովանդակություն զանազան ժողովուրդների մոտ»¹:

Ալանդական արևելագիտության ուսումնասիրության առարկան էին, այսպիսով, գլխավորապես Ասիայի և Աֆրիկայի երկրներն ու ժողովուրդները, նրանց մշակույթն ու պատմությունը:

Արևելագիտությունը, որպես գիտության ճյուղ, առաջ է եկել XVI—XVII դարերում, կասյիտալիստական հարաբերությունների օրրաններում՝ Հոլանդիայում, Անգլիայում և Ֆրանսիայում, որոնք դարձան նաև առաջին զաղութատեր պետությունները: Որքան ավելի Արևելքի երկրները սկզբնական կասյիտալիստական կուտակման աղբյուրից վերաճեցին առևտրական և արդյունաբերական բուրժուազիայի հարստացման աղբյուրի, այնքան ավելի հետևողական դարձավ նրանց ուսումնասիրությունը, քանի որ այն անհրաժեշտ էր նրանց յուրացման և շահագործման համար: Հետևապես, սկզբնական շրջանում արևելագիտությունը ուներ գլխավորապես գործնական նշանակություն, այն սահմանափակվում էր տվյալ երկրների ժողովուրդների աշխարհագրական, ազգագրական, ցեղային տվյալների և նրանց լեզուների ուսումնասիրություններով: Այդպես էլ այն դասավանդվել է ուսումնական հաստատություններում (Փարիզ, Օքսֆորդ, Լայդեն և այլն) XVI դարից մինչև XX դարի սկզբները:

Հանգամանքների բերումով՝ առևտրականների, միսիոներների գրառումները, պատերազմների և այլ արշավների մասնակիցների աշխատությունները, ճամփորդական նոթերն ունեին զուտ նկարագրական բնույթ (օր. Ադամ Օլարիին Պարսկաստանի և Կովկասի մասին, 1647 և այլն): Մերձավոր ծանոթությունը, Արևելքի վերաբերյալ նյութերի կուտակումը հնարավոր են դարձնում հետզհետե ներկայացնել այդ երկրների սոցիալ-տնտեսական վիճակը. հասարակական փոխհարաբերությունները և նրանց յուրահատկությունները (Ֆ. Բերնիե, «Մեծ Մոդուլի պետության վերջին քաղաքական հեղաշրջումների պատմությունը», 1670 և ուրիշներ):

Ջանազան հարստությունների հետ Արևմուտք բերված բնագրերի, ձեռագիր աղբյուրների կուտակման հետևանքով, Լայդենի, Լոնդոնի, Փարիզի, ավելի ուշ՝ Պետերբուրգի մատենադարաններում և հատուկ գրապահոցներում ստեղծ-

¹ Н. И. Конрад, Запад и Восток, М., 1966, стр. 473.

վում են հարուստ ֆոնդեր: XVII—XIX դարերում դրանց ուսումնասիրության աշխատանքները խթանում են արևելյան բանասիրության, որպես բազմա-
ճյուղ գիտության, զարգացումը: Արևելագիտությունը հետզհետե դրվում է գի-
տական հիմքերի վրա: 1771 թ. ֆրանսերեն է թարգմանվում Ավեստան: Նույն
դարի վերջին եվրոսլայում հատուկ ուսումնասիրության առարկա է դառնում
սանսկրիտը: Ընդլայնվում է մասնագիտական ուսումնական հաստատու-
թյունների ցանցը: XIX դարում մեծ հաջողությունների է հասնում Հին Արևելքի
պատմության ուսումնասիրությունը: Վերծանվում են ասուրա-բաբելական,
եգիպտական, հին պարսկական սեպագրերն ու արձանագրությունները, հրա-
պարակվում հնագիտական պեղումների նյութերը: Բազմաթիվ կենտրոններում
կազմակերպվում են Արևելքի երկրների մշակույթը, կրոնը ուսումնասիրող
ընկերություններ և գիտական հաստատություններ:

Նույն երևույթը տեղի է ունենում նաև Ռուսաստանում: Ռուս վաճառական
և ճանապարհորդ Ա.Ֆանասի Նիկիտինի (XVI դար) Հնդկաստան կատարած
ուղևորության նկարագրությունից հետո հետաքրքրությունը դեպի Արևելքը
աճում է: Սակայն գործնական ղգալի քայլեր կատարվում են միայն Պետրոս
I-ի ժամանակաշրջանում: 1705 թ. Պետերբուրգում բացվում է դպրոց, որտեղ
սկսվում է ճապոնեերենի դասավանդումը: Շուտով, լեզուներ սովորելու նպա-
տակով, Պարսկաստան, Թուրքիա և Մոնղոլիա են ուղարկվում մի խումբ երի-
տասարդներ: Դեպի Սիբիր կազմակերպված արշավները և նրա ուսումնասիրու-
թյունը, 1722—1723 թթ. Պարսկաստան կատարած ուսական զորքերի արշա-
վանքը, Չինաստանում մշտական դիվանագիտական ներկայացուցչության հիմ-
նումը (1727 թ.) պայմաններ ստեղծեցին ավելի մոտիկից ծանոթանալու Արե-
վելքի հետ: Այնուհետև, արևելյան լեզուները հաստատուն տեղ գրավեցին նո-
րաստեղծ գիտությունների ակադեմիայում: Եղավ նաև «Ասիական ակադե-
միա» կազմակերպելու առաջարկ, որը թեպետ չիրականացավ, բայց XVIII
դարի երկրորդ կեսից, գործնական նկատառումներով, արևելյան լեզուների
դասավանդումը մտցվեց Կազանի գիմնազիայում (թաթարերեն, արաբերեն,
պարսկերեն, հայերեն, մոնղոլերեն, չինարեն, մանջուրերեն), Իրկուտսկի և
Օմսկի, Տաշքենդի և Աստրախանի որոշ դպրոցներում: Արաբերեն, պարսկե-
րեն և թուրքերեն լեզուների ուսուցումը պարտադիր է դառնում Արտաքին գոր-
ծերի կոլեգիայի և ապա Արտաքին գործերի մինիստրության ասիական գերա-
տեսչության ուսումնական բաժանմունքում, որը գոյություն ունեցավ 84
տարի:

Ռուս-թուրքական հարաբերությունների սրումը և բախումներն անհրա-
ժեշտ են դարձնում ուս-թուրքերեն և թուրք-ուսերեն բառարանների, թուր-
քերենի քերականության հրատարակումը:

Տնտեսական, քաղաքական, դիվանագիտական, մշակութային կապերի
ուժեղացումը Արևելքի երկրների հետ XIX դարի սկզբին նոր խթան հանդիսա-
ցավ արևելագիտության զարգացման համար:

1805 թ. հարկովի համալսարանում հիմնվում է երկրում առաջին, արևել-
յան լեզուների ամբիոնը: Որոշ նոր լեզուների դասավանդում կազմակերպվում
է Կազանի, Մոսկվայի, Դորպատի, Վիլնյուի, Պետերբուրգի համալսարաննե-
րում, ժամանակի որոշ տարբերությամբ և փոփոխակի հաջողություններով,
որի պատճառը գլխավորապես մասնագետների պակասն էր, որոնց (ժ. Դե-

մանժ, Ֆ. Շարմուա և ուրիշներ) սկզբնական շրջանում հրավիրում էին արտասահմանից և հաճախ տեղափոխում մի համալսարանից մյուսը: Այդ հանգամանքը չէր խանգարում արևելագիտության զարգացմանը երկրում: Դրա առհասկառ չափան էին Լազարյան ճեմարանի բացումը Մոսկվայում (1815 թ.), Ռիշելիեի ուսումնարանի ստեղծումը Օդեսայում (1817 թ.), Ասիական թանգարանի հիմնադրումը Պետերբուրգում, արևելյան լեզուների դասավանդման ընդլայնումը բազմաթիվ դպրոցներում: Գիտությունների ակադեմիայում (1810 թ.) թղթակից-անգամների և ակադեմիկոսների տեղեր են հատկացվում խոշոր արևելագետների համար: Այսուհետև, ռուս արևելագիտությունը աչքի է ընկնում բազմակողմանի պատրաստված հետազոտողներով, որոնց շնորհիվ դարակեսից արևելագիտության մեջ սկսում են խորանալ և զարգանալ առանձին ուղղություններ:

Միջազգային ճանաչում է գտնում ռուսական շինագիտությունը, սկսած Ն. Բիշուրինի (1777—1853 թթ.) ժամանակից: Հանձինս Վ. Վասիլևի, Ի. Զախարովի, Ա. Իվանովսկու և ուրիշների, արևելագիտության այդ ճյուղը հարստանում է բանասիրական և պատմական մի շարք ուսումնասիրություններով, մշակվում են շինական լեզվի բառարաններ կազմելու մեթոդներ:

Մոնղոլների պատմության, լեզվի, գրականության, բանահյուսության բնագավառում մեծ ծառայություններ են մատուցում Յա. Շմիդտը, Օ. Կուլալևսկին, Ա. Բորովնիկովը, Ա. Պոգոդեևը, ավելի ուշ, սովետական շրջանում՝ ակադեմիկոս մոնղոլագետ Բ. Վլադիմիրցևը:

Ռուս գիտնականները միաժամանակ հայտնաբերեցին և գիտական շրջանառության մեջ մտցրին հսկայական քանակությամբ փաստաթղթեր, աղբյուրներ, նյութական և հոգևոր մշակույթի հուշարձաններ՝ ընդհանրապես Միջին Ասիայի, Սիբիրի, Մոնղոլիայի և Զինաստանի վերաբերյալ: Հիշենք գեթ Պ. Սեմյոնով-Տյանշանսկուն, Գ. Պոտանինին, Գ. Գուլով-Գուստյովին, Ն. Պրժեվալսկուն, Պ. Կոլլովին:

Հնդկագիտությունը, սանսկրիտի և Հնդկաստանի ժամանակակից լեզուների ու գրականության ուսումնասիրությունը կապված է Պ. Պետրովի, Ի. Մինևեի, Ս. Օ. Օլդենբուրգի, Պ. Շչեբբատսկու և ուրիշների անունների հետ:

Ռուսաստանի հին՝ պատմական, տնտեսական, քաղաքական, մշակութային կապերն իր մերձավոր հարևանների հետ թելադրում են ստեղծելու հատուկ պայմաններ արաբագիտության, իրանագիտության և թուրքագիտության զարգացման համար: Առաջին հերթին և կոմպլեքսային ձևով դասավանդվում են Ֆերձավոր և Միջին արևելքի ժողովուրդների լեզուները: Այսուհետև, գիտական հիմքերի վրա է դրվում առանձին պրոբլեմների ուսումնասիրությունը:

Արաբերենի և պարսկերենի առաջին քրեստոմատիաների, բառարանների և քերականության ձեռնարկների հեղինակն է Մոսկվայի համալսարանի դասախոս և ռեկտոր Ա. Բուդիրևը: Ակադեմիկոս Բ. Դորնը զգալի ծառայություններ է մատուցել աֆղանագիտությանը և պարսկագիտությանը: Պարսից գրականության, բանահյուսության, լեզվի պատմության վերաբերյալ իրենց առաջնակարգ ուսումնասիրություններով հայտնի են Կ. Կոսսովիչը, Վ. Ժուկովսկին, Կ. Կալեմանը, Ֆ. Կորշը, Ա. Ռոմասկևիչը, Ն. Վեսելովսկին և շատ ուրիշներ:

Միջազգային առումով մեծ է ռուս արաբագետների ավանդը: Դրանում իրենց պատկառելի բաժինն ունեն Ծ. Սենկովսկին, Գ. Սաբուլովը, Դ. Խվու-

սոնը, Վ. Գրիգասը, Վ. Տիգենհաուզենը, Մ. Նավրոցկին, Ն. Մեդնիկովը, Ա. Շմիդտը և մի շարք այլ բազմավաստակ հետազոտողներ: Սովետական արաբագիտության երախտավոր Ի. Կրաչկովսկու կարծիքով, այդ գիտությունը XIX դարում տվել է երկու հսկաներ, դարի սկզբին՝ Ֆրենին, վերջին՝ Վ. Ռոզենին:

Մեծաթիվ թուրքագետներից անհրաժեշտ է հիշել Ն. Բերյոզինի («Թուրքական գրականության պատմություն»), Վ. Ռադլովի («Թուրքական ցեղերի ժողովրդական գրականության նմուշներ», 7 հատ.), Ա. Քյազիմբեկի (Բաբը և բաբինները, Մյուրիդիդը և Շամիլը, Իսլամի պատմությունը, աղբյուրներն լեզվի քերականություն), Վ. Սմիրնովի անունները: Վերջինս ուսումնասիրել է մոնղոլների ազդեցության սյրոբլեմը Ռուսաստանի վրա, գրել է «Քուլիբեյ Գոմյուրջինսկին և XVII դարի մյուս օսմանյան գրողները Թուրքիայի անկման պատճառների մասին» և այլ գործեր: Միջին Ասիայի պատմություն, աշխարհագրություն, մշակույթի ուսումնասիրություններ երկար տարիներ զբաղվել և մեծարժեք աշխատություններ են թողել Վ. Վելյամինով-Ջերնովը, Ն. Խանիկովը, Վ. Գրիգորևը, Վ. Բարտոլդը, Ն. Քաթանովը, Լ. Բուդաղովը և ուրիշներ:

Հին Արևելքի պատմությունը ամփոփված է համաշխարհային ճանաչում գտած՝ Բ. Տուրանի, Վ. Ստրովկի և այլոց գործերում: Արևելագիտության զարգացմանը Ռուսաստանում, բացի դիտական և ուսումնական հաստատություններից, նպաստել են աշխարհագրական, հնագիտական, ինչպես նաև բնագիտական և մարդաբանական ընկերությունները, Միջին և Արևելյան Ասիայի ուսումնասիրության ռուսական կոմիտեն, Մոսկվայի և Պետերբուրգի հանրային գրադարանները, Գլխավոր շտաբի արևելյան բաժինը, Արևելագիտական և ռուս օրինենտալիստների ընկերությունները և բազմաթիվ պարբերական և այլ հրատարակություններ (տեղեկագրեր, տեղեկատուներ, բյուլետեններ, ժողովածուներ, ամսագրեր), որոնք լույս էին տեսնում սկսած XVIII դարի սկզբից մինչև Հոկտեմբերյան հեղափոխությունը:

Արևելագիտության հատուկ ճյուղերից են կովկասագիտությունը և հայագիտությունը, որոնց զարգացման գործում մեծ գեր են խաղացել Լազարյան ճեմարանը, Մոսկվայի և Պետերբուրգի գիտական և ուսումնական հիմնարկներն ու նրանց աշխատակիցները (ակադ. Մ. Բրոսսե, Մ. Էմին, Ա. Խուդաբաշյան, Ն. Մառ, Ա. Յազարեյի, Ք. Պատկանյան, Լ. Մսերյանց, Լ. Լոպատինսկի և այլն):

Որպես հայ մտքի գիտական հատուկ ուղղություն, ստեղծվել և զարգացել է հայ արևելագիտությունը: Այն տարբերվում է եվրոպական և ռուսական արևելագիտությունից նրանով, որ եթե առաջինների համար Արևելքը ներկայանում էր որպես գրավման և շահագործման առարկա, կամ առնչվում էր հարևանների հետ գործնական կապեր ունենալու անհրաժեշտությանը, ապա հայ արևելագիտության համար ուսումնասիրության առարկա երկրներն իրականում եղել են իր ժողովրդի հայրենիքը, նրա ապրած բնաշխարհը, կամ էլ մերձավորագույն հարևանների, համարյա նույն բնապատմական և սոցիալ-տնտեսական միջավայրը: Այս իմաստով էլ հայկական բնագրերն ունեն առաջնակարգ սկզբնաղբյուրի նշանակություն:

Հայ ժողովրդի պատմական բախտի հետ կապված է եղել նրա նյութական և հոգևոր մշակույթի հուշարձանների առկայությունը և պահպանությունը:

Արտագաղթի հետ բնօրրանից դուրս է բերվել գրավոր հուշարձանների մեծ մասը և կենտրոնացվել Երևանի, Լենինգրադի, Քբիլիսիի, Փարիզի, Լոնդոնի, Վիեննայի, Վենետիկի, Երուսաղեմի, Նոր Զուղայի և այլ քաղաքների գրապահոցներում, արխիվներում և մասնավոր հավաքածուներում: Նրանց մի մասը լուսաբանելով հայ ժողովրդի պատմությունը, անդրադառնում է նաև Արևելքի հարևան ժողովուրդների անցյալի առանձին դրվագներին: Մյուս մասը, ուղղակի ընդհանուր բնույթի արևելագիտական աղբյուրներ են և վերաբերում են ամբողջ Արևելքին: Դրանցից են հայ հին միջնադարյան մշակույթի ակնավոր ներկայացուցիչներ Ստեփաննոս Տարոնցի-Ասողիկի «Համընդհանուր պատմությունը» (XI դ.) և Վարդան Արևելցու (XIII դ.) «Տիեզերական պատմությունը» (XIII դ.), Գրիգոր Դարանաղցի-Կամախեցու «Ժամանակագրությունը», Զաքարիա Սարկավազի «Պատմագրությունը» (XVII դ.), Ղուկաս Ինճիկյանի և Ստ. Ադոնցի «Աշխարհագրություն չորից մասանց աշխարհի» (XIX դ.) բազմահատորյակը և այլն: Հայ հեղինակների որոշ աշխատություններ էլ պարունակում են մանրամասն պատմական, բնագրական, տնտեսական, աղագրական և այլ տեղեկություններ: Հնդկաստանի (Հ. Սիմոնյան «Հայդար Ալիի կենսագրությունը», Թովմաս Խոջամալյան «Հնդկաստանի պատմությունը»), կամ այլ երկրների վերաբերյալ: Այսպես, Իրանի և Օսմանյան կայսրության պատմության համար շափազանց կարևոր են այնպիսի գործեր, ինչպիսիք են Մովսես Կաղանկատվացու՝ «Պատմություն աղվանից աշխարհի», Ղևոնդ Պատմիչի՝ «Պատմություն»-ը, Գրիգոր Ակնեցու՝ «Պատմություն ազգին նետողաց», Թովմա Մեծոփեցու՝ «Պատմություն Լանկ-Թեմուրայ և յաջորդաց իւրոց», Զաքարիա Ագուլեցու՝ «Օրագրությունը», ինչպես նաև Սիմեոն Ապարանցու, Խաչատուր Զուղայեցու, Աբրահամ Կրետացու, Առաքել Դավրիժեցու, Սիմեոն Լեհացու, Քյումուրճյան Երեմիա Չելեբիի և ուրիշների գործերը: Հայ հեղինակների մի շարք աշխատություններ լուսաբանում են Աֆրիկայի արաբական երկրների կամ հեռավոր Արևելքի ժողովուրդների պատմությունը:

Բազմակենտրոն է հայ արևելագիտությունը: Պատմական հանգամանքների բերումով XIX դարում հայ մշակույթի և գիտության օջախներն են դառնում Մոսկվան և Պետերբուրգը, էջմիածինն ու Թիֆլիսը, Կոստանդնուպոլիսն ու Կալկաթան, Վիեննան ու Վենետիկը, Կահիրեն ու Մադրասը, ինչպես նաև Եվրոպայի և Ասիայի շատ կենտրոններ: Մոսկվայի ևադարյան ճեմարանում իրենց գործունեությունն են ծավալում հայ մշակույթի ներկայացուցիչներ Ս. Նազարյանը, Մ. էմինը, Գ. Քանանյանը, Կ. Կոստանյանը, Գ. Խալաթյանը, Լ. Մսերյանը: Հայկական ուսումնական հիմնարկը, ակադեմիկոս Հովսեփ Օրբելու արտահայտությամբ, դառնում է «ռուսական արևելագիտության խոշորագույն ուսումնական ու գիտական կենտրոններից մեկը»: Այստեղ են ստանում իրենց կրթությունը և ծավալում գործունեություն խոշոր ռուս արևելագետներ Ն. Աշմարինը, Խ. Բարանովը, Վ. Գորդևսկին, Ն. Դմիտրիևը, Ա. Կրիմսկին, Բ. Միլլերը, Վ. Մինորսկին, Ա. Սեմյոնովը և ուրիշներ:

XIX դարի սկզբի լավագույն արևելագետ՝ արաբերենի, պարսկերենի, թուրքերենի քաջատեղյակ, այդ լեզուների բառարանների և մի շարք աշխատությունների հեղինակ է Գևորգ Դպիրը: Հարուստ արևելագիտական նյութեր են պարունակում Ղ. Ալիշանի «Այրարատ», «Սիսուան», «Սիսական», «Շիրակ»

կապիտալ գործերն ու այլ աշխատությունները: Գ. Այվազովսկին, Գ. Սրվան-ձրտյանը, Ա. Դագյանը, Պ. Նաթանյանը և ուրիշներ, իրենց ստեղծագործություններում լուսաբանում են Օսմանյան կայսրության պատմությունը, նրա ներքին վիճակը և արտաքին քաղաքականությունը: Իրանի պատմությանն ու մշակույթին են նվիրված՝ Մ. Թադիագյանի, Ա. Տեր-Հովհաննիսյանի, Կ. Եգյանի, Լ. Տիգրանովի, Հ. Առաքելյանի աշխատությունները: Հին ու նոր Արևելքը իր պատշաճ տեղն է գրավել Ն. Ազոնցի, Լեոյի, Ա. Ալպոյաճյանի, Ա. Սուրմելյանի, Գ. Մսերյանի և հայ ուրիշ պատմաբանների գործերում:

Հոկտեմբերյան հեղափոխության հաղթանակը բախտորոշ նշանակություն ունեցավ նաև արևելագիտության հետագա զարգացման համար: Նրա մեթոդաբանական հիմքը և ելակետը դարձան Կ. Մարքսի, Ֆ. Էնգելսի, Վ. Ի. Լենինի գաղափարները Արևելքի և Արևմուտքի երկրների զարգացման ընդհանուր օրինաչափությունների մասին, նրանց ուսմունքը՝ ազգային և գաղութային հարցերի վերաբերյալ: Բուրժուական արևելագիտությունը, որը զգալի ծառայություններ էր մատուցել իմպերիալիստական շրջանների գաղութային քաղաքականությանը, փոխարինվեց սկզբունքորեն նոր, սովետական, մարքսիստական արևելագիտությամբ, որի նպատակն է գիտականորեն ապացուցել գաղութային սխտեմի ոչնչացման անխուսափելիությունը և պատմական անհրաժեշտությունը, օգնել Արևելքի ժողովուրդների ազգային-ազատագրական շարժումների, դեմոկրատական հեղափոխությունների հաղթանակին, նրանց ազատության և անկախության ամրապնդմանը:

Սովետական կառավարության, անձամբ Վ. Ի. Լենինի աջակցությամբ ստեղծվում են արևելագիտական ուսումնական և գիտական հիմնարկներ: Լազարյան ճեմարանի վերակառուցմամբ՝ 1920 թ. կազմակերպվում է կենդանի արևելյան լեզուների կենտրոնական ինստիտուտ, իսկ 1921 թ.՝ Մոսկվայի արևելագիտական ինստիտուտը: 1922 թ. հիմնադրվում է արևելագիտական համառոտաստանյան գիտական ասոցիացիա, որը հրատարակում է «Նովի վոստոկ» և «Ռևոլյուցիոննի վոստոկ» ամսագրերը: 1930 թ. բացվում է գիտությունների ակադեմիայի արևելագիտության ինստիտուտը, որը և դառնում է ռուս արևելագիտության լավագույն տրագիցիաների շարունակողը, հաղթահարում ռուսական ակադեմիական արևելագիտության և ժամանակակից Արևելքի իրականության միջև եղած ճեղքվածքը:

Արդիակյան պրոբլեմները դառնում են արևելագիտական ուսումնասիրությունների կարևորագույն մասը, հատկապես երկրորդ համաշխարհային պատերազմից հետո, երբ սերտ կապեր հաստատվեցին ՍՍՀՄ և Արևելքի երկրների միջև:

Սովետական կառավարության անունից ողջունելով արևելագետների 25-րդ կոնգրեսի պատգամավորներին, Ա. Միկոյանը նշեց, որ «Արևելագիտությունը միայն այն դեպքում կարող է լայն ճանաչում գտնել, երբ նա կծառայի Արևելքի ժողովուրդների շահերին»: Այս նշանաբանի տակ էլ զարգացել է սովետական արևելագիտությունը:

Լեզվաբանությունն ընդլայնեց իր հետաքրքրությունների բնագավառը պատմական, աշխարհագրական և պրակտիկ իմաստով: Հատուկ ուշադրության արժանացան առանձին լեզուների կազմավորման պրոցեսը և նոր ալբուբեն ստեղծելու խնդիրը այն ժողովուրդների համար, որոնք դեռ չունեին դիր ու դրա-

կանություն: 1930 թ. որոշ բուհերում սկսեցին դասավանդվել աֆրիկական լեզուներ, իսկ 1945 թ. Լենինգրադի համալսարանում կազմակերպվեց այդ լեզուների ամբիոն Դ. Օլգեոգգեի ղեկավարությամբ, որն արդեն հրատարակել է որոշ լեզուների բառարաններ և քերականության ձևարկներ: Արևելյան լեզուների ուսումնասիրությանը նվիրված աշխատություններով հուշակ են ձեռք բերում Խ. Բարանովը, Բ. Պաշկովը, Ե. Սևորդյանը, Գ. Մերեթելին, Ա. Կոնոնովը, Ի. Օշանինը, Գ. Սանժեկը, Վ. Աբաևը և ուրիշներ:

Արևելքի դրականության ականավոր մասնագետները (Ի. Բրագինսկի, Ե. Չելիշև, Ա. Միրզոև, Ի. Ֆելշտինսկի, Լ. Ալկաևա, Լ. էյդլին) մեծ ջանասիրությամբ աշխատում են լուսաբանել զարգացող ժողովուրդների անցյալի հարցերը, հետևում են ժամանակակից դրականության խնդիրներին, արձագանքում բոլոր նոր, առաջադիմական երևույթներին՝ քննադատության ենթարկելով հետադիմական ուղղությունները:

Զգալի հաջողությունների հասան Արևելքի հին և նոր պատմության, պատմագիտության ուղղությունները:

Այս բնագավառում իր ծառայություններն ունի (չնայած որոշակի սխալներին) Մ. Պավլովիչը (Վոլոնտեր), որպես արևելագետների առաջին ասոցիացիայի նախագահ և բազմաթիվ ուսումնասիրությունների հեղինակ: Մերձավոր և Միջին արևելքի իրադարձությունների մասին կարևոր աշխատությունների հեղինակ են Վ. Վորովսկին (1871—1923 թթ.) և Ֆ. Ռոտշտեյնը: Այս մարքսիստ պատմաբանների կողքին կարելի է հիշատակել այնպիսի գիտնականների, որոնք լուրջ ավանդ են մուծել նախահոկտեմբերյան շրջանի արևելագիտության մեջ և իրենց կապիտալ գործերով ավելի շատ բան տվել սովետական գիտությանը: Դրանք են՝ ակադեմիկոսներ Վ. Բարտոլդը (Իրան, Աֆղանստան, Միջին Ասիա), գրականագետ Ա. Կրիմսկին, Վ. Գորդլևսկին (Պարսկաստան, Թուրքիա), Ի. Կրաչկովսկին (արաբական երկրներ), Ա. Բարանիկովը, Ս. Օլգենբուրգը, Ֆ. Շչերբատսկին (Հնդկաստան), Վ. Ալեքսեևը (Զինաստան), Ն. Կոնրադը (Ճապոնիա), Ա. Գուբերը (Հարավ-Արևելյան Ասիայի երկրներ): Նույնը կարելի է ասել ակադ. Բ. Տուրաևի և Վ. Ստրովեի մասին, որոնց արժանավոր հետևորդներն են, հին Արևելքի ուսումնասիրության գծով՝ Բ. Պրոտրովսկին, Մ. Մասսոնը, Ս. Կիսելևը, Ա. Օկլագենիկովը, Մ. Տոլստովը, Գ. Մելիքիշվիլին, Ս. Ռուդենկոն, Յու. Պերեպելկինը, Ի. Դյակոնովը, Մ. Կորոստովցևը, Ա. Ալի-Ջադեն և սովետական շատ ուրիշ գիտնականներ:

Արևելքում ֆեոդալիզմի ձևավորման և զարգացման պրոբլեմի ուսումնասիրման բնագավառում լուրջ ավանդ մտցրեցին Ն. Պիդուկևսկայի, Ա. Յակուբովսկու, Ի. Պետրուշևսկու, Ի. Ռեյսների, ՍՍՀՄ ԳԱ Աֆրիկայի ինստիտուտի հիմնադիր Ի. Պետեխինի և շատ երիտասարդ մասնագետների ուսումնասիրություններն ու կոլեկտիվ աշխատությունները:

Նոր և նորագույն պատմության շրջանը, ազգային-ազատագրման պրոցեսի արդի ժամանակաշրջանի խնդիրներն իրենց խորը լուսաբանումն են դտել Ե. Ժուկովի, Բ. Գաֆուրովի, Ռ. Ուլյանովսկու, Վ. Լուցկու, Ե. Բելյաևի, Ա. Դյակովի, Ա. Շպիրտի, Ս. Տիխոնովսկու, Ա. Միլերի, Ե. Լուգշովսկու և այլոց գործերում: Հիշյալ գիտնականների գործունեությունը կապված է գլխավորապես գիտությունների ակադեմիայի արևելագիտության ինստիտուտի հետ, որի 27 բաժիններում ու սեկտորներում և նրա լենինգրադյան բաժանմունքի կաբինետներում աշխատում են մի քանի հարյուր աշխատակիցներ: Սրանց ընդհա-

նուր ճանաչում դտած աշխատությունները, որոնց թիվը վերջին 10 տարում անցնում է 1100-ից, թարգմանվում են նաև եվրոպական և արևելյան լեզուներով և ընդգրկում են Արևելքի երկրների ժամանակակից պրոբլեմները:

Սովետական արևելագիտության բնորոշ կողմերից է՝ տրագիցիոն կենտրոնների կողքին նորերի կազմակերպումը: Այսպես, Արևելքի երկրների խնդիրներով, բացի արևելագիտության (Ասիայի ժողովուրդներին) ինստիտուտից, ղեկավարում են՝ Աֆրիկայի, Լատինական Ամերիկայի, Համաշխարհային էկոնոմիկայի և միջազգային հարաբերությունների, ազգագրության, հնագիտության և գիտությունների ակադեմիայի այլ ինստիտուտներ ու Ռուսաստանյան Ֆեդերացիայի բազմաթիվ ֆիլիալներ, Ուկրաինայի երկու համալսարաններ, ինչպես նաև գիտա-հետազոտական հատուկ հիմնարկներ ու բարձրագույն ուսումնական հաստատություններ՝ Ուզբեկստանում, Տաջիկստանում, Ղազախստանում, Կիրգիզիստանում, Թուրքմենստանում, Վրաստանում, Ադրբեյջանում և Հայաստանում:

Սովետական Հայաստանի առաջին ուսումնական և գիտական հիմնարկը լիցել է Երևանի համալսարանը, որտեղ 1923 թ. սկսած՝ դասավանդվել են արևելագիտական առարկաներ, 1940 թ. հիմնվել է արևելյան լեզուների և գրականության ամբիոնը, բացվել է բանասիրական ֆակուլտետի համապատասխան բաժինը, որի հիման վրա և ստեղծվել է (1968 թ.) արևելագիտության ֆակուլտետը:

Համալսարանում են կատարել իրենց հայագիտական և արևելագիտական աշխատանքները բազմավաստակ գիտնականներ Զ. Աճառյանը, Զ. Մանանդյանը, Գ. Ղափանցյանը, Լեոն և Նրանց աշակերտները: 1930—1940 թթ. հայ ժողովրդի և նրա հարեանների հին ու նոր պատմության և մշակույթի ուսումնասիրության բնագավառում աշխատանքներ տարվել են ԳԱ հայկական ֆիլիալում: Այնուհետև, գիտությունների ակադեմիայի ստեղծումից հետո, գիտա-հետազոտական աշխատանքը կենտրոնանում է այստեղ: Ակադեմիայի առաջին պրեզիդենտ, խոշորագույն սովետական արևելագետ, կովկասագետ և հայագետ Զ. Օրբելին (1887—1961 թթ.) մեծ երախտիք ունի հայ արևելագիտական մտքի զարգացման բնագավառում:

Շուտով պատմության ինստիտուտի կազմում ձևավորվում է Մերձավոր և Միջին արևելքի պատմության և տնտեսության խումբը, որի բաղադրի վրա, 1958 թ. կազմակերպվում է արևելագիտության սեկտորը: Գոյության 10 տարիների ընթացքում սեկտորը հրատարակել է ավելի քան 40 անուն գիրք՝ արաբական երկրների, Իրանի և Թուրքիայի նոր և նորագույն պատմության, տնտեսության ու մշակույթի վերաբերյալ: Բացի արաբագիտությունից, իրանագիտությունից և թուրքագիտությունից, սեկտորը ղեկավարում է նաև քրդագիտությամբ:

Հայաստանի քրդադեմոստրի շարունակելով ռուս (Ա. Ժաբա, Պ. Լերխ, Վ. Մինորսկի, Վ. Նիկիտին, Պ. Ավերյանով և այլն) և հայ (Խ. Աբովյան, Գ. Սրվանձտյան, Մ. Եղիազարյան, Ս. Հայկունի, Լազո-Հակոբ Ղազարյան) քրդագիտության լավագույն տրագիցիաները, հաջողությամբ մշակում են քուրդ ժողովրդի պատմության, լեզվի, գրականության կարևորագույն պրոբլեմները:

Ուսումնասիրվող խնդիրները արտացոլվել են սեկտորի ժողովածուներում («Արևելագիտական ժողովածու» 1-ին և 2-րդ, «Մերձավոր և Միջին Արևելքի երկրները և ժողովուրդները» թեմատիկ ժողովածուների հրատարակվող շար-

քը), արաբական ժողովուրդների ազգային-ազատագրական պայքարին, նավթի պրոբլեմին և օտար կապիտալի ներխուժմանը, Իրանի ազրարային հարաբերություններին. հասարակական հոսանքներին ու ազգային հարցին, Թուրքիայի ներքին և արտաքին քաղաքականությանը, Արևելքի հայ գաղութների պատմությանը, մեր ժողովրդի և հարևանների կուլտուրական կապերին, լեզվական-գրական տոնջություններին և այլ պրոբլեմներին վերաբերող ուսումնասիրություններում: Հրատարակվել են թուրքական և արաբական աղբյուրները հայերի և Հայաստանի մասին (5 հատոր, տպագրության են պատրաստել Ա. Սաֆրաստյանը և Հ. Նալբանդյանը). Շարունակվում է աշխատանքը միջնադարյան և Հին Արևելքի ուսումնասիրության բնագավառում: Այս գործում կարևոր ավանդ են մուծում պատմության, հնագիտության և ազգագրության, արվեստի պատմության, լեզվի, գրականության, փիլիսոփայության ակադեմիական ինստիտուտները, Մատենադարանը, համալսարանը, հայկական մանկավարժական ինստիտուտը:

Արևելագիտության սեկտորը համագործակցում է ինչպես Սովետական Միության, այնպես էլ արտասահմանյան մի շարք գիտական հիմնարկների և արևելագետների հետ:

1960 թ. արևելագետների համաշխարհային 25-րդ կոնգրեսի աշխատանքներն ավարտվելուց անմիջապես հետո, Երևան ժամանեցին այնպիսի աշխարհահռչակ գիտնական-արևելագետներ, ինչպիսիք են՝ պրոֆեսորներ Ֆ. Մինո-րսկին (Անգլիա), Վ. Բընիցիանուն (Ռումինիա) և ուրիշներ:

Հետագա տարիներին սեկտորի աշխատանքների հետ ծանոթացան ու գիտական զեկուցումներով հանգես եկան արտասահմանյան մի շարք ականավոր արևելագետներ՝ դոկտոր Դ. Մաքքենդին, պրոֆեսոր Դոուսեթը, Պիրսոնը, Լանգը (Անգլիա), Ֆրալը, Սանջյանը (ԱՄՆ), Ֆարուքյանը, Ֆրուզանֆարը, Նքթայը (Իրան), Էմիլ Թուման, Բ. Ջոմբլաթը, Ժորժ Հանան (Լիբանան), Ռաշիդ Քուդը, Նիզար Նալիլը (Սիրիա), Աբգու-Համիդ Ալ-Ավաջին (Իրաք), Ուպադհայան (Հնդկաստան), Ա. Կիթիկավուլան (Չեխոսլովակիա), Լ. Նիրշովիչը (Լեհաստան): Գիտական կապերի ընդլայնումը մեծապես նպաստում է գրքափոխանակությանը և սեկտորի մասնագիտական գրադարանի հարստացմանը, որը ներկայումս ունի մի քանի հազար կտոր գրականություն, այդ թվում նաև օտար լեզուներով մոտ 2000 այնպիսի գրքեր, որոնք հազվագյուտ են Սովետական Միությունում:

Այս առումով իրենց հայրենանվեր գործերով դրվատանքի են արժանի վարուժան Սալաթյանը, Ռոբեր Ջեբեջյանը, Երվանդ Հյուսիսյանը, Հովհաննես Թորիկյանը և ուրիշներ: Վերջիններիս և այլոց օգնությամբ շարունակում է ստացվել օտար լեզուներով գրականություն, մամուլ, անհատական գրադարաններ:

Այսպիսով ստեղծվում է անհրաժեշտ արևելագիտական քաղա, որը հնարավորություն կտա ընդլայնելու ակադեմիայի և հանրապետության արևելագետների գիտա-հետազոտական աշխատանքները:

Սովետական արևելագետների համատեղ աշխատանքի արդյունքն է հանդիսանում լույս տեսած կոլեկտիվ աշխատությունների մի ամբողջ մատենաշար՝ գաղութատիրության, Արևելքում իմպերիալիզմի քաղաքականության դեմ, ՍՍՀՄ-ի, սոցիալիստական երկրների և զարգացող երկրների համագործակ-

ցության մասին: 1957 թ. սկսել է իր աշխատանքը Հատուկ արևելագիտական հրատարակչությունը, որը տարեկան լույս է ընծայում ավելի քան 400 անուն գիրք:

Արևելագիտության զարգացմանը նպաստեցին մարքսիզմ-լենինիզմի կլասիկների երկերի և թեմատիկ ժողովածուների, հանրագիտարանների, ՍՍՀՄ արտաքին քաղաքականության փաստաթղթերի հրատարակությունները: Կարևոր նշանակություն ունի «Համաշխարհային պատմության», Ասիայի և Աֆրիկայի, ինչպես նաև առանձին երկրների պատմության տարբեր շրջանների վերաբերյալ աշխատությունների և թարգմանական գրականության լույս ընծայումը, արևելագիտական պարբերականների՝ «Նարոդի Աղիի ի Աֆրիկի» և «Աղիյա ի Աֆրիկա սեզոնյա» հրատարակումը:

Հատկանշական է այն հանգամանքը, որ մարքսիստական արևելագիտությունը զարգանում է ոչ միայն մեր երկրում, ԳԴՀ-ում, Լեհաստանում, Չեխոսլովակիայում, Բուլղարիայում ու Ռումինիայում, այլև Արևմուտքի շատ երկրներում, որոնք այլևս մենաշնորհ չունեն գիտության այս ասպարեզում: Բավական է հիշատակել, որ արևելագիտությամբ այս կամ այն չափով զբաղվող մոտ 80 երկրների կեսը, Արևելքի երկրներն են: Այդ գիտության համաշխարհային բնույթի մասին է խոսում այն փաստը, որ արևելագետների միջազգային կոնգրեսները տեղի են ունենում պարբերաբար, 3 տարին մեկ անգամ: Ցայժմ գումարված 27 կոնգրեսից մեկը (մինչև 2-րդ համաշխարհային պատերազմը) տեղի է ունեցել Արևելքի երկրներում և մեկն էլ Ռուսաստանում (3-րդը—1878 թ.): Վերջին 20 տարիների ընթացքում տեղի ունեցած կոնգրեսներից երկուսը գումարվել է Ասիայում (22-րդը—Ստամբուլում, 1951 թ. և 26-րդը Դելիում՝ 1964 թ.), մեկը՝ Մոսկվայում (25-րդը—1960 թ.), մեկն էլ ԱՄՆ-ում (27-րդը—1967 թ.):

Մարդկության բախտորոշ գործերում Արևելքի դերի և նշանակության բարձրացմանը համընթաց բուռն զարգացում է ապրում համաշխարհային արևելագիտությունը: Այդ պրոցեսին զուգընթաց ուժեղանում է պայքարը մարքսիստական և բուրժուական արևելագիտության միջև: Ահա թե ինչու, հիշյալ բնագավառը ևս դարձել է երկու սիստեմների պայքարի կարևոր գաղափարախոսական զենքերից մեկը: Անկասկած է, որ մեկուկես դարի կայուն տրադիցիաներ ունեցող սովետական արևելագիտությունը այսուհետև էլ կկատարի իր առաջատար դերը՝ հանուն Արևելքի ժողովուրդների վերջնական ազատագրման:

ИЗ ИСТОРИИ РАЗВИТИЯ ОТЕЧЕСТВЕННОГО ВОСТОКОВЕДЕНИЯ

О. Г. ИНДЖИКЯН

Р е з ю м е

В статье, в связи с 150-летием востоковедческих учреждений страны, излагается краткая история развития востоковедения в Европе и России. Указывается роль Азиатского музея, государственных университетов Москвы, Ленинграда и ряда других городов, а также Лазаревского и других институтов в развитии русского востоковедения.

Специальный раздел посвящен советскому востоковедению, начиная с его первых шагов до современного состояния.

В статье особое внимание уделено развитию армянской востоковедной мысли. Упомянуты как средневековые авторы, их произведения и источники, так и исследования нового и новейшего времени, включая труды Сектора востоковедения, других научных учреждений и вузов республики, а также зарубежных армянских авторов.

Марксистское востоковедение представлено как орудие теоретической борьбы против идеологии и политики колониализма и империализма.